

ს ა ქ ა რ თ ვ ე ლ ო ს ტ ე ქ ნ ი კ უ რ ი უ ნ ი ვ ე რ ს ი ტ ე ტ ი

დ ე ბ უ ლ ე ბ ა

არჩევნების ჩატარების შესახებ

წინამდებარე დებულება „უმაღლესი განათლების შესახებ საქართველოს კანონისა“ და საჯარო სამართლის იურიდიული პირის - საქართველოს ტექნიკური უნივერსიტეტის (შემდგომში „უნივერსიტეტი“) წესდების საფუძველზე აყალიბებს მართვის ორგანოების (მმართველი სუბიექტების), ასევე უნივერსიტეტისა და ფაკულტეტის ხარისხის უზრუნველყოფის სამსახურის უფროსებისა და უნივერსიტეტის ბიბლიოთეკის დირექტორის არჩევის წესებს.

თავი I. უნივერსიტეტის მართვის ორგანოები და მმართველი სუბიექტები

მუხლი 1. მართვის ორგანოები (მმართველი სუბიექტები)

1. უნივერსიტეტის მართვის ორგანოებია (მმართველი სუბიექტებია): აკადემიური და წარმომადგენლობითი საბჭოები, რექტორი, ადმინისტრაციის ხელმძღვანელი და უნივერსიტეტის ხარისხის უზრუნველყოფის სამსახური.
2. ფაკულტეტის მართვის ორგანოებია (მმართველი სუბიექტებია): ფაკულტეტის საბჭო, დეკანი და ფაკულტეტის ხარისხის უზრუნველყოფის სამსახური.

თავი II. თანამდებობის დაკავების და არჩევნების გამოცხადების წესი

მუხლი 2. მართვის ორგანოების (მმართველი სუბიექტების) არჩევის წესი

1. რექტორის, ადმინისტრაციის ხელმძღვანელისა და უნივერსიტეტის ხარისხის უზრუნველყოფის სამსახურის უფროსის არჩევა ხდება პირდაპირი, თავისუფალი და თანასწორი არჩევნების საფუძველზე, ფარული კენჭისყრით, მხოლოდ ღია კონკურსის წესით, რომელიც უნდა შეესაბამებოდეს გამჭვირვალობის, თანასწორობისა და სამართლიანი კონკურენციის პრინციპებს.
2. აკადემიური და წარმომადგენლობითი საბჭოების, ასევე ფაკულტეტის საბჭოს (თუ ეს ფაკულტეტის დებულებით არის გათვალისწინებული), დეკანისა და ფაკულტეტის ხარისხის უზრუნველყოფის სამსახურის უფროსის არჩევა ხდება უნივერსიტეტის ფარგლებში, პირდაპირი, თავისუფალი და თანასწორი არჩევნების საფუძველზე ფარული კენჭისყრით.
3. აკადემიური საბჭოს წევრებს ირჩევენ შესაბამისი ფაკულტეტის აკადემიური პერსონალის წევრები და ფაკულტეტის საბჭოს წევრ სტუდენტთა თვითმმართველობის წარმომადგენლები.
4. რექტორის არჩევა ხდება აკადემიური საბჭოს მიერ.
5. წარმომადგენლობითი საბჭოს წევრებს ფაკულტეტის აკადემიური პერსონალის შემადგენლობიდან ირჩევენ შესაბამისი ფაკულტეტის აკადემიური პერსონალის ყველა წევრი, ხოლო სტუდენტების შემადგენლობიდან – ფაკულტეტის ყველა სტუდენტი.
6. ადმინისტრაციის ხელმძღვანელის და უნივერსიტეტის ხარისხის უზრუნველყოფის სამსახურის უფროსის კანდიდატურებს ირჩევენ აკადემიური საბჭო და თანამდებობაზე ამტკიცებს წარმომადგენლობითი საბჭო.
7. ფაკულტეტის დეკანს ირჩევენ შესაბამისი ფაკულტეტის საბჭო.
8. ფაკულტეტის ხარისხის უზრუნველყოფის სამსახურის უფროსს, უნივერსიტეტის ხარისხის უზრუნველყოფის სამსახურის უფროსის წარდგინებით, ამტკიცებს ფაკულტეტის საბჭო.
9. ფაკულტეტის საბჭოს (თუ ეს ფაკულტეტის დებულებით არის გათვალისწინებული), ფაკულტეტის აკადემიური პერსონალისა და სტუდენტთა წარმომადგენლობის საფუძველზე, ირჩევენ ფაკულტეტის აკადემიური პერსონალის და სტუდენტური თვითმმართველობის წევრები ცალ-ცალკე.

მუხლი 3. უნივერსიტეტის ბიბლიოთეკის დირექტორის არჩევის წესი

1. უნივერსიტეტის ბიბლიოთეკის დირექტორის თანამდებობაზე არჩევა ხდება აკადემიური საბჭოს მიერ ღია კონკურსის წესით, ფარული კენჭისყრით.

მუხლი 4. არჩევნების გამოცხადება

1. არჩევნებს ნიშნავს უნივერსიტეტის აკადემიური საბჭო.
2. არჩევნების ჩატარების შესახებ მიღებული დადგენილება ხელმისაწვდომი უნდა იყოს საჯარო გაცნობისათვის, რომელიც განცხადების სახით უნდა გამოიკრას უნივერსიტეტის თვალსაჩინო ადგილებში; ასევე უნდა განთავსდეს უნივერსიტეტის ვებ-გვერდზე და გამოქვეყნდეს ბეჭდური მედიის ორგანოში.
3. განცხადებაში აღინიშნება კანდიდატების რეგისტრაციის დაწყების თარიღი, განაცხადების მიღების ბოლო ვადა, არჩევნების ჩატარებისა და მისი შედეგების გამოქვეყნების თარიღები. ასევე კანდიდატთა მიმართ წაყენებული მოთხოვნები და მათ მიერ წარმოსადგენ დოკუმენტთა ნუსხა.
4. დებულებით განსაზღვრულ დღეებში იგულისხმება კალენდარული დღეები, თუ ამავ დებულებით სხვა რამ არ არის სპეციალურად მითითებული.

თავი III. საარჩევნო კომისიები

მუხლი 5. უნივერსიტეტის საარჩევნო კომისია

1. უნივერსიტეტის რექტორის, ადმინისტრაციის ხელმძღვანელის, უნივერსიტეტის ხარისხის უზრუნველყოფის სამსახურის უფროსის, უნივერსიტეტის ბიბლიოთეკის დირექტორის არჩევნების ჩასატარებლად აკადემიური საბჭოს მიერ იქმნება უნივერსიტეტის საარჩევნო კომისია.
2. უნივერსიტეტის საარჩევნო კომისია შედგება 5 წევრისაგან, რომელთაგან 4 წევრის კანდიდატურას ირჩევს აკადემიური საბჭო, ხოლო 1 წევრის კანდიდატურის შერჩევა ხდება უნივერსიტეტის სტუდენტური თვითმმართველობის ორგანოს მიერ.
3. უნივერსიტეტის საარჩევნო კომისიის შემადგენლობაში თითოეულ წევრს ამტკიცებს აკადემიური საბჭო ღია კენჭისყრის წესით დამსწრე წევრთა ხმების უბრალო უმრავლესობით.
4. უნივერსიტეტის საარჩევნო კომისიის თავმჯდომარეს ირჩევს თავად კომისია.

მუხლი 6. ფაკულტეტის საარჩევნო კომისია

1. უნივერსიტეტის აკადემიურ და წარმომადგენლობით საბჭოებში წარმომადგენლების ასარჩევად, ასევე ფაკულტეტის მართვის ორგანოების: დეკანის, ფაკულტეტის ხარისხის უზრუნველყოფის სამსახურის უფროსის, ფაკულტეტის საბჭოს არჩევნების ჩასატარებლად შესაბამისი ფაკულტეტის საბჭოს მიერ (არჩევნების ჩატარების შესახებ უნივერსიტეტის აკადემიური საბჭოს შესაბამისი დადგენილების საფუძველზე) იქმნება ფაკულტეტის საარჩევნო კომისია.
2. ფაკულტეტის საარჩევნო კომისია შედგება 5 წევრისაგან, რომელთაგან 4 წევრის კანდიდატურას შეარჩევს ფაკულტეტის საბჭო, ხოლო 1 წევრის კანდიდატურის შერჩევა ხდება ფაკულტეტის სტუდენტური თვითმმართველობის ორგანოს მიერ.
3. ფაკულტეტის საარჩევნო კომისიის შემადგენლობაში თითოეულ წევრს ამტკიცებს ფაკულტეტის საბჭო, ღია კენჭისყრის წესით, დამსწრე წევრთა ხმების უბრალო უმრავლესობით.
4. ფაკულტეტის საარჩევნო კომისიის თავმჯდომარეს ირჩევს თავად ფაკულტეტის საარჩევნო კომისია.

მუხლი 7. საარჩევნო კომისიების უფლება-მოვალეობები

1. საარჩევნო კომისია უფლებამოსილია:
 - ა) მიიღოს ყველა გადაწყვეტილება არჩევნების საორგანიზაციო საკითხებთან დაკავშირებით, თუ ამ დებულებით სხვა რამ არ არის გათვალისწინებული;

ბ) მიიღოს გადაწყვეტილება ამ დებულებით გათვალისწინებულ მის კომპეტენციაში შემავალ სხვა საკითხებზე.

2. საარჩევნო კომისიას ეკისრება ვალდებულება არჩევნების ამ დებულებით დადგენილი წესით ჩატარებაზე.

3. საარჩევნო კომისიის თავმჯდომარე აირჩევა კომისიის პირველ სხდომაზე მისი შემადგენლობიდან, ღია კენჭისყრით, კომისიის წევრთა ხმათა უმრავლესობით. საარჩევნო კომისიის თავმჯდომარე ხელმძღვანელობს კომისიის სხდომებს, ხელს აწერს შესაბამის ოქმებს და ახორციელებს სხვა უფლებამოსილებებს.

4. საარჩევნო კომისიის მდივად აირჩევა კომისიის წევრი კომისიის პირველივე სხდომაზე, ღია კენჭისყრით, კომისიის წევრების ხმათა უმრავლესობით. საარჩევნო კომისიის მდივანი უზრუნველყოფს კომისიის საქმისწარმოებას, ადგენს კომისიის სხდომის დღის წესრიგს და სხდომის ოქმებს, რეგისტრაციაში ატარებს საარჩევნო კომისიაში შეტანილ კორესპონდენციას, არჩევნებში მონაწილეობის მსურველ კანდიდატებს და აძლევს შესაბამის მოწმობებს, ადგენს არჩევნების შედეგების შემაჯამებელ ოქმებს და ახორციელებს მისთვის მინიჭებულ სხვა უფლებამოსილებებს.

5. საარჩევნო კომისიის თავმჯდომარე, მდივანი და კომისიის წევრები შეიძლება ამ დებულებით განსაზღვრული ფუნქციების შესრულებისათვის უნივერსიტეტის ან ფაკულტეტის ბიუჯეტიდან იღებდნენ ანაზღაურებას.

მუხლი 8. ინტერესთა შეუთავსებლობა

1. საარჩევნო კომისიის წევრი არ შეიძლება იყოს უნივერსიტეტის ადმინისტრაციული პერსონალის წევრი, აგრეთვე მართვის ორგანოს წევრი ან არჩევნებში მონაწილე კანდიდატი.

თავი IV. აკადემიური საბჭოს არჩევნის წესი

მუხლი 9. აკადემიური საბჭოს არჩევნების გამოცხადება

1. უნივერსიტეტის აკადემიური საბჭოს შემადგენლობის განახლების ან აკადემიურ საბჭოში წარმოქმნილი ვაკანსიის შევსების მიზნით არჩევნები ინიშნება აკადემიური საბჭოს წევრთა უფლებამოსილების ამოწურვამდე არა უგვიანეს 30 დღით ადრე, ხოლო აკადემიურ საბჭოში შესაბამისი ვაკანსიის წარმოქმნიდან არა უგვიანეს 30 დღის ვადაში. აღნიშნული ვადის 3 თვემდე გაგრძელების შესახებ გადაწყვეტილებას იღებს აკადემიური საბჭო.

მუხლი 10. აკადემიური საბჭოს შემადგენლობა

1. უნივერსიტეტის უმაღლესი წარმომადგენლობითი ორგანო – აკადემიური საბჭო – აირჩევა უნივერსიტეტის ძირითადი სტრუქტურული ერთეულებიდან – ფაკულტეტებიდან წარმომადგენლობის საფუძველზე; აკადემიურ საბჭოში თითოეული ფაკულტეტიდან აირჩევა ორ-ორი წარმომადგენელი - პროფესორი (გარდა ასისტენტ-პროფესორისა).

2. კანდიდატთა რეგისტრაცია მიმდინარეობს განცხადების გამოქვეყნებიდან 10 დღის განმავლობაში. რეგისტრაციაზე უარის შემთხვევაში მიეთითება ხარვეზი კანდიდატის მიერ წარმოდგენილ დოკუმენტებში. კანდიდატი უფლებამოსილია ხარვეზი გამოასწოროს 2 დღის ვადაში.

3. კანდიდატი უფლებამოსილია რეგისტრაციაზე უარი გაასაჩივროს ფაკულტეტის საარჩევნო კომისიაში 1 დღის განმავლობაში. საჩივართან დაკავშირებულ გადაწყვეტილებას ფაკულტეტის საარჩევნო კომისია იღებს 3 დღის განმავლობაში.

4. აკადემიური საბჭოს წევრი ირჩევა 4 წლის ვადით.

მუხლი 11. აკადემიურ საბჭოში ასარჩევ კანდიდატთა და ამომრჩეველთა რეგისტრაციის წესი

1. აკადემიური საბჭოს არჩევნებში ხმის მიცემის უფლება აქვს ფაკულტეტის აკადემიური პერსონალის ყველა წევრს და ფაკულტეტის საბჭოს წევრ სტუდენტთა თვითმმართველობის წარმომადგენლებს.

2. აკადემიური საბჭოს არჩევნებში ამომრჩეველთა რეგისტრაციის წესს განსაზღვრავს შესაბამისი საარჩევნო კომისია.

მუხლი 12. აკადემიური საბჭოს წევრის უფლებამოსილების ცნობა

1. აკადემიური საბჭოს პირველსავე სხდომაზე, რომელიც იმართება არჩევნების საბოლოო შედეგების გამოქვეყნების შემდეგ, აკადემიური საბჭო სითი შემადგენლობის უმრავლესობით ცნობს თავის ახლადარჩეული წევრის უფლებამოსილებას.

თავი V. წარმომადგენლობითი საბჭოს არჩევის წესი

მუხლი 13. წარმომადგენლობითი საბჭოს არჩევნების გამოცხადება

1. უნივერსიტეტის წარმომადგენლობითი საბჭოს შემადგენლობის მორიგი განახლების ან წარმომადგენლობით საბჭოში წარმოქმნილი ვაკანსიის შევსების მიზნით არჩევნები ინიშნება წარმომადგენლობითი საბჭოს წევრთა უფლებამოსილების ამოწურვამდე არა უგვიანეს 30 დღით ადრე, ხოლო წარმომადგენლობით საბჭოში შესაბამისი ვაკანსიის წარმოქმნიდან არა უგვიანეს 30 დღის ვადაში. აღნიშნული ვადის გაგრძელების შესახებ გადაწყვეტილებას იღებს წარმომადგენლობითი საბჭო.

მუხლი 14. წარმომადგენლობითი საბჭოს შემადგენლობა

1. უნივერსიტეტის წარმომადგენლობითი ორგანოა უნივერსიტეტის წარმომადგენლობითი საბჭო, რომელიც აირჩევა უნივერსიტეტის ძირითადი ერთეულებიდან – ფაკულტეტებიდან წარმომადგენლობის საფუძველზე, სტუდენტებისა და აკადემიური პერსონალის მიერ ცალ-ცალკე, ძირითად საგანმანათლებლო ერთეულებზე მათი რაოდენობის პროპორციულად. წარმომადგენლობითი საბჭოს წევრთა მინიმალური რაოდენობა არ შეიძლება იყოს აკადემიური საბჭოს წევრთა ორმაგ რაოდენობაზე ნაკლები.

2. სტუდენტები შეადგენენ წარმომადგენლობითი საბჭოს სრული შემადგენლობის ერთ მესამედს. ასისტენტ-პროფესორი, რომელიც არის დოქტორანტი, არჩევნებში მონაწილეობს, როგორც სტუდენტი. წარმომადგენლობით საბჭოში სტუდენტთა რაოდენობის დასადგენად დამრგვალება ხორციელდება სტუდენტთა სასარგებლოდ.

3. წარმომადგენლობითი საბჭოს შენადგენლობაში შედის უნივერსიტეტის ბიბლიოთეკის დირექტორი.

4. წარმომადგენლობითი საბჭოს შემადგენლობაში არ შეიძლება არჩეულ იყვნენ ადმინისტრაციული და დამხმარე პერსონალის წარმომადგენლები, აგრეთვე აკადემიური საბჭოს წევრები.

5. წარმომადგენლობითი საბჭოს უფლებამოსილების ვადაა 4 წელი.

6. წარმომადგენლობითი საბჭოს წევრის უფლებამოსილების ვადამდე შეწყვეტის შემთხვევაში წარმომადგენლობითი საბჭოს უფლებამოსილების ვადით მისი წევრი ხდება კანდიდატი, რომელმაც შესაბამის არჩევნებში უფლებამოსილება-შეწყვეტილი წევრის შემდეგ ხმების უმეტესი რაოდენობა მოაგროვა. ასეთის არარსებობის შემთხვევაში, არჩევნები ტარდება შესაბამისი წარმომადგენლის ასარჩევად უფლებამოსილება-შეწყვეტილი წევრის დარჩენილი ვადით.

მუხლი 15. წარმომადგენლობით საბჭოში ასარჩევ კანდიდატთა და ამომრჩეველთა რეგისტრაციის წესი

1. წარმომადგენლობით საბჭოში სტუდენტებს ირჩევს ფაკულტეტის ყველა სტუდენტი, მათ შორის ყველა მაგისტრანტი და დოქტორანტი.

2. აკადემიური პერსონალის წარმომადგენლებს და პირებს, რომლებსაც უნივერსიტეტმა მიანიჭა აკადემიური ხარისხი ან/და კვალიფიკაცია, აგრეთვე საზოგადოების წარმომადგენლებს ირჩევს ფაკულტეტის აკადემიური პერსონალი – ამომრჩეველთა სიებში რეგისტრირებული ყველა სრული პროფესორი, ასოცირებული პროფესორი და ასისტენტ-პროფესორი, გარდა დოქტორანტისა.

3. წარმომადგენლობითი საბჭოს არჩევნებში ამომრჩეველთა რეგისტრაციის წესს განსაზღვრავს შესაბამისი საარჩევნო კომისია.

4. წარმომადგენლობით საბჭოში ასარჩევ კანდიდატთა რეგისტრაციას ახორციელებს ფაკულტეტის საარჩევნო კომისია.
5. კანდიდატთა რეგისტრაცია მიმდინარეობს განცხადების გამოქვეყნებიდან 10 დღის განმავლობაში. რეგისტრაციაზე უარის თქმის შემთხვევაში მიუთითება ხარვეზი კანდიდატის მიერ წარმოდგენილ დოკუმენტებში. კანდიდატი უფლებამოსილია ხარვეზები გამოასწოროს 2 დღის ვადაში.
6. კანდიდატი უფლებამოსილია რეგისტრაციაზე უარი გაასაჩივროს ფაკულტეტის საარჩევნო კომისიაში 1 დღის განმავლობაში. საჩივართან დაკავშირებით გადაწყვეტილებას ფაკულტეტის საარჩევნო კომისია იღებს 3 დღის განმავლობაში.

მუხლი 16. წარმომადგენლობით საბჭოს უფლებამოსილების ცნობა და მისი სპიკერის არჩევა.

1. წარმომადგენლობით საბჭოს პირველ სხდომას იწვევს უნივერსიტეტის რექტორი (რექტორის მ.შ.), არა უგვიანეს 5 დღისა წარმომადგენლობითი საბჭოს წევრთა არანაკლებ 2/3-ის არჩევიდან.
2. პირველ სხდომას თავმჯდომარეობს რექტორი. სხდომა უფლებამოსილია, თუ მას ესწრება სიითი შემადგენლობის უმრავლესობა.
3. წარმომადგენლობითი საბჭო, სიითი შემადგენლობის უმრავლესობით, ცნობს თავის (ახლადარჩეული წევრების) უფლებამოსილებას პირველივე სხდომაზე, რომელიც იმართება არჩევნების საბოლოო შედეგების გამოქვეყნების შემდეგ.
4. წარმომადგენლობითი საბჭო, თავისი რიგებიდან ღია კენჭისყრით, სიითი შემადგენლობის უმრავლესობით 4 წლის ვადით, ირჩევს სპიკერს.
5. არჩეულად ჩაითვლება პირი, რომელიც მიიღებს საბჭოს სიითი შემადგენლობის ნახევარზე მეტს. თუ გამარჯვებული ვერ გამოვლინდა, არა უგვიანეს 5 დღის განმავლობაში ინიშნება ახალი არჩევნების თარიღი. ახალი არჩევნები ტარდება იმავე წესით. წინა არჩევნებში მონაწილე პრეტენდენტები შემდეგ არჩევნებში მონაწილეობს ვერ მიიღებენ.
6. არჩეულ სპიკერს უნივერსიტეტი არჩევიდან 2 კვირის ვადაში წარუდგენს საქართველოს მეცნიერებისა და განათლების სამინისტროს, სარეგისტრაციოდ.

თავი VI. რექტორის არჩევის წესი

მუხლი 17. რექტორის არჩევნების გამოცხადება

1. უნივერსიტეტის რექტორის თანამდებობის დასაკავებლად კანდიდატების რეგისტრაციის შესახებ განცხადებას აქვეყნებს უნივერსიტეტის აკადემიური საბჭო შესაბამისი ვაკანსიის წარმოქმნიდან არა უგვიანეს 10 დღის ვადაში. აღნიშნული ვადის გაგრძელების შესახებ გადაწყვეტილებას იღებს აკადემიური საბჭო.
2. განცხადებაში, გარდა ამ დებულების მე-5 მუხლით დადგენილი ინფორმაციისა, აღინიშნება წარსადგენი დოკუმენტების ნუსხა, რაც განისაზღვრება აკადემიური საბჭოს აქტით.
3. ამ მუხლის პირველ პუნქტში აღნიშნული განცხადება ქვეყნდება კანდიდატების რეგისტრაციამდე არა უგვიანეს 1 და არჩევნების ჩატარებამდე არა უგვიანეს 2 თვით ადრე.

მუხლი 18. რექტორობის კანდიდატის რეგისტრაციაში გატარება

1. რექტორობის კანდიდატთა რეგისტრაციაში გატარება იწყება 17-ე მუხლით განსაზღვრული განცხადების გამოქვეყნებიდან 1 თვის შემდეგ.
2. რეგისტრაციაში გატარდება ნებისმიერი კანდიდატი, რომელიც არის უნივერსიტეტის ან სხვა აკრედიტებული დაწესებულების სრული პროფესორი და გააჩნია შესაბამისი დამადასტურებელი საბუთი.
3. კანდიდატის რეგისტრაციაში გატარებისათვის, გარდა ამ მუხლის მე-2 პუნქტში აღნიშნული საბუთისა, სავალდებულოა მის მიერ პირადობის დამადასტურებელი მოწმობის ან პასპორტის და სამოქმედო გეგმის წარდგენა.

4. კანდიდატებს რეგისტრაციაში ატარებს უნივერსიტეტის საარჩევნო კომისია. რეგისტრაცია გრძელდება 1 თვის განმავლობაში.
5. კანდიდატის რეგისტრაციაზე უარი დასაბუთებული უნდა იყოს წერილობითი ფორმით.
6. რეგისტრაციაზე უარის შესახებ გადაწყვეტილებაში მიეთითება ხარვეზი კანდიდატის მიერ წარმოდგენილ დოკუმენტებში. ხარვეზის გასწორება შესაძლებელია 2 დღის ვადაში.

მუხლი 19. უნივერსიტეტის რექტორის არჩევა

1. კანდიდატების რეგისტრაციის დასრულებიდან 30 დღის შემდეგ, მაგრამ არა უგვიანეს 40 დღისა, იმართება უნივერსიტეტის რექტორის არჩევნები.
2. კანდიდატი აკადემიურ საბჭოს საჯაროდ წარუდგენს სამოქმედო გეგმას.
3. რექტორი აირჩევა აკადემიური საბჭოს მიერ ფარული კენჭისყრით, სიითი შემადგენლობის უმრავლესობით.
4. რექტორი აირჩევა 4 წლის ვადით.

თავი VII. ადმინისტრაციის ხელმძღვანელის არჩევის წესი

მუხლი 20. ადმინისტრაციის ხელმძღვანელის არჩევნების გამოცხადება

1. ადმინისტრაციის ხელმძღვანელის თანამდებობის დასაკავებლად კანდიდატების რეგისტრაციის შესახებ განცხადებას აქვეყნებს უნივერსიტეტის აკადემიური საბჭო შესაბამისი ვაკანსიის წარმოქმნიდან არა უგვიანეს 5 დღის ვადაში. აღნიშნული ვადის გაგრძელების შესახებ გადაწყვეტილებას იღებს აკადემიური საბჭო.
2. განცხადებაში, გარდა ამ დებულების მე-4 მუხლით დადგენილი ინფორმაციისა, აღინიშნება, თუ რა მოთხოვნებს უნდა აკმაყოფილებდეს კანდიდატი და წარსადგენი დოკუმენტების ნუსხა.
3. კანდიდატის მიმართ წაყენებული მოთხოვნები და წარსადგენი დოკუმენტების ნუსხა განისაზღვრება აკადემიური საბჭოს აქტით.

მუხლი 21. ადმინისტრაციის ხელმძღვანელის კანდიდატის რეგისტრაციაში გატარება

1. კანდიდატის რეგისტრაციაში გატარება იწყება მე-20 მუხლით განსაზღვრული განცხადების გამოქვეყნებიდან 5 დღეში.
2. რეგისტრაციაში გატარდება ნებისმიერი კანდიდატი, რომელიც აკმაყოფილებს განცხადებაში მოცემულ მოთხოვნებს და გააჩნია შესაბამისი დამადასტურებელი საბუთები.
3. კანდიდატის რეგისტრაციაში გატარებისათვის, გარდა ამ მუხლის მე-2 პუნქტში აღნიშნული საბუთისა, სავალდებულოა მის მიერ პირადობის დამადასტურებელი მოწმობის ან პასპორტის და სამოქმედო გეგმის წარდგენა.
4. კანდიდატებს რეგისტრაციაში ატარებს უნივერსიტეტის საარჩევნო კომისია. კანდიდატების რეგისტრაცია მიმდინარეობს 10 დღის განმავლობაში.
5. კანდიდატის რეგისტრაციაზე უარი დასაბუთებული უნდა იყოს წერილობითი ფორმით.
6. რეგისტრაციაზე უარის შესახებ გადაწყვეტილებაში მიეთითება ხარვეზი კანდიდატის მიერ წარმოდგენილ დოკუმენტებში. ხარვეზის გასწორება შესაძლებელია 2 დღის ვადაში.
7. აკადემიური საბჭო რეგისტრაციის დაწყებიდან 10 დღის ვადაში ეცნობა შემოსულ განცხადებებს, განიხილავს კანდიდატებს და ფარული კენჭისყრით, სიითი შემადგენლობის უმრავლესობით შერჩეულ კანდიდატს წარუდგენს წარმომადგენლობით საბჭოს.

მუხლი 22. ადმინისტრაციის ხელმძღვანელის დამტკიცება წარმომადგენლობითი საბჭოს მიერ.

1. წარმომადგენლობითი საბჭო აკადემიური საბჭოს მიერ კანდიდატის წარდგენიდან 10 დღის ვადაში ფარული კენჭისყრით, სიითი შემადგენლობის უმრავლესობით, ამტკიცებს ადმინისტრაციის ხელმძღვანელს.

2. ხმისმიცემის პროცედურის ჩატარებას და შედეგების შეჯამებას ამ დებულების შესაბამისად უზრუნველყოფს უნივერსიტეტის საარჩევნო კომისია. კომისია არჩევნების შედეგებს აცხადებს საჯაროდ არჩევნების ჩატარების დღეს.
3. წარმომადგენლობითი საბჭოს მიერ კანდიდატის დაუმტკიცებლობის შემთხვევაში, აკადემიური საბჭო უფლებამოსილია ერთი კვირის ვადაში წარმომადგენლობით საბჭოს ხელახლა წარუდგინოს დასამტკიცებლად იგივე პიროვნება.
4. კანდიდატის ხელმეორედ დაუმტკიცებლობის შემთხვევაში აკადემიური საბჭო ატარებს ამ თავით გათვალისწინებულ შერჩევის პროცედურას და კონკურსის საფუძველზე შერჩეულ ახალ კანდიდატურას წარუდგენს წარმომადგენლობით საბჭოს.
5. ადმინისტრაციის ხელმძღვანელის უფლებამოსილების ვადაა 4 წელი.

თავი VIII. უნივერსიტეტის ხარისხის უზრუნველყოფის სამსახურის უფროსის არჩევის წესი

მუხლი 23. უნივერსიტეტის ხარისხის უზრუნველყოფის სამსახურის უფროსის არჩევნების გამოცხადება

1. უნივერსიტეტის ხარისხის უზრუნველყოფის სამსახურის უფროსის თანამდებობის დასაკავებლად კანდიდატების რეგისტრაციის შესახებ განცხადებას აქვეყნებს უნივერსიტეტის აკადემიური საბჭო შესაბამისი ვაკანსიის წარმოქმნიდან არა უგვიანეს 1 თვის ვადაში. აღნიშნული ვადის 3 თვემდე გაგრძელების შესახებ გადაწყვეტილებას იღებს აკადემიური საბჭო.
2. განცხადებაში, გარდა ამ დებულების მე-4 მუხლით დადგენილი ინფორმაციისა, აღინიშნება არჩევნების ჩატარების თარიღი და მოთხოვნები, რასაც უნდა აკმაყოფილებდეს კანდიდატი, ასევე წარსადგენი დოკუმენტების ნუსხა. მოთხოვნები და წარსადგენი დოკუმენტების ნუსხა განისაზღვრება აკადემიური საბჭოს აქტით.

მუხლი 24. უნივერსიტეტის ხარისხის უზრუნველყოფის სამსახურის უფროსის კანდიდატის რეგისტრაციაში გატარება

1. კანდიდატის რეგისტრაციაში გატარება იწყება შესაბამისი განცხადების გამოქვეყნებიდან 1 კვირის შემდეგ.
2. რეგისტრაციაში გატარდება ნებისმიერი კანდიდატი, რომელიც აკმაყოფილებს განცხადებაში მოცემულ მოთხოვნებს და გააჩნია შესაბამისი დამადასტურებელი დოკუმენტები.
3. კანდიდატის რეგისტრაციაში გატარებისათვის, გარდა ამ მუხლის მე-2 პუნქტში აღნიშნული დოკუმენტებისა, სავალდებულოა მის მიერ პირადობის დამადასტურებელი მოწმობის ან პასპორტის და სამოქმედო გეგმის წარდგენა.
4. კანდიდატებს რეგისტრაციაში ატარებს უნივერსიტეტის საარჩევნო კომისია. კანდიდატების რეგისტრაცია მიმდინარეობს 15 დღის განმავლობაში.
5. კანდიდატის რეგისტრაციაზე უარი დასაბუთებული უნდა იყოს წერილობითი ფორმით.
6. რეგისტრაციაზე უარის შესახებ გადაწყვეტილებაში მიეთითება ხარვეზი კანდიდატის მიერ წარმოდგენილ დოკუმენტებში. ხარვეზის გასწორება შესაძლებელია 2 დღის ვადაში.
7. აკადემიური საბჭო შემოსულ განცხადებებს განიხილავს რეგისტრაციის დაწყებიდან 10 დღის ვადაში, ეცნობა კანდიდატებს და ფარული კენჭისყრით, სიითი შემადგენლობის უმრავლესობით შერჩეულ კანდიდატურას წარუდგენს წარმომადგენლობით საბჭოს.

მუხლი 25. უნივერსიტეტის ხარისხის უზრუნველყოფის სამსახურის უფროსის დამტკიცება წარმომადგენლობითი საბჭოს მიერ

1. წარმომადგენლობითი საბჭო აკადემიური საბჭოს მიერ კანდიდატის წარდგენიდან 5 დღის ვადაში ფარული კენჭისყრით, სიითი შემადგენლობის

- უმრავლესობით, ამტკიცებს უნივერსიტეტის ხარისხის უზრუნველყოფის სამსახურის უფროსს.
2. ხმის მიცემის პროცედურის ჩატარებას და შედეგების შეჯამებას ამ დებულებით უზრუნველყოფს შესაბამისი საარჩევნო კომისია. კომისია არჩევნების შედეგებს საჯაროდ აცხადებს არჩევნების ჩატარების დღეს.
 3. წარმომადგენლობითი საბჭოს მიერ კანდიდატის დაუმტკიცებლობის შემთხვევაში, აკადემიური საბჭო უფლებამოსილია ერთი კვირის ვადაში წარმომადგენლობით საბჭოს ხელახლა წარუდგინოს დასამტკიცებლად იგივე პიროვნება.
 4. უნივერსიტეტის ხარისხის უზრუნველყოფის სამსახურის უფროსის უფლებამოსილების ვადაა 4 წელი.

თავი IX. უნივერსიტეტის ბიბლიოთეკის დირექტორის არჩევის წესი

მუხლი 26. უნივერსიტეტის ბიბლიოთეკის დირექტორის არჩევნების გამოცხადება

1. უნივერსიტეტის ბიბლიოთეკის დირექტორის თანამდებობის დასაკავებლად კანდიდატთა რეგისტრაციის შესახებ განცხადებას აქვეყნებს უნივერსიტეტის აკადემიური საბჭო, შესაბამისი ვაკანსიის წარმოქმნიდან არა უგვიანეს 1 თვის ვადაში. აღნიშნული ვადის 3 თვემდე გაგრძელების შესახებ გადაწყვეტილებას იღებს აკადემიური საბჭო.
2. განცხადებაში აღინიშნება, თუ რა კრიტერიუმებს უნდა აკმაყოფილებდეს კანდიდატი და წარსადგენი დოკუმენტების ნუსხა, ასევე არჩევნების ჩატარების ადგილი და თარიღი. კრიტერიუმები და წარსადგენი დოკუმენტების ნუსხა განისაზღვრება აკადემიური საბჭოს აქტით.

მუხლი 27. უნივერსიტეტის ბიბლიოთეკის დირექტორობის კანდიდატის რეგისტრაციაში გატარება და არჩევა

1. კანდიდატის რეგისტრაციაში გატარება იწყება შესაბამისი განცხადების გამოქვეყნებიდან 1 კვირის შემდეგ.
2. რეგისტრაციაში გატარდება ნებისმიერი კანდიდატურა, რომელიც აკმაყოფილებს განცხადებაში მოცემულ მოთხოვნებს და გააჩნია შესაბამისი დამადასტურებელი საბუთები.
3. კანდიდატის რეგისტრაციაში გატარებისათვის, გარდა ამ მუხლის მე-2 პუნქტში აღნიშნული საბუთისა, სავალდებულოა მის მიერ პირადობის დამადასტურებელი მოწმობის ან პასპორტის და სამოქმედო გეგმის წარდგენა.
4. კანდიდატებს რეგისტრაციაში ატარებს შესაბამისი საარჩევნო კომისია. კანდიდატების რეგისტრაცია მიმდინარეობს 20 დღის განმავლობაში.
5. კანდიდატის რეგისტრაციაზე უარი დასაბუთებული უნდა იყოს წერილობითი ფორმით.
6. რეგისტრაციაზე უარის შესახებ გადაწყვეტილებაში მიეთითება ხარვეზი კანდიდატის მიერ წარმოდგენილ დოკუმენტებში. ხარვეზის გასწორება შესაძლებელია 2 დღის ვადაში.
7. აკადემიური საბჭო შემოსულ განცხადებებს განიხილავს 10 დღის ვადაში, ეცნობა კანდიდატურებს და მე-11 დღეს ფარული კენჭისყრით, სიითი შემადგენლობის უმრავლესობით, ირჩევს უნივერსიტეტის ბიბლიოთეკის დირექტორს.
8. ხმის მიცემის პროცედურის ჩატარებას და შედეგების შეჯამებას ამ დებულების შესაბამისად უზრუნველყოფს უნივერსიტეტის საარჩევნო კომისია. კომისია არჩევნების შედეგებს საჯაროდ აცხადებს არჩევნების ჩატარების დღეს.
9. უნივერსიტეტის ბიბლიოთეკის დირექტორის უფლებამოსილების შეწყვეტის შემთხვევაში ტარდება ამ თავით გათვალისწინებული პროცედურა.

თავი X. ფაკულტეტის დეკანის არჩევის წესი

მუხლი 28. ფაკულტეტის დეკანის არჩევნების გამოცხადება

1. ფაკულტეტის დეკანის თანამდებობის დასაკავებლად კანდიდატების რეგისტრაციის შესახებ განცხადებს აქვეყნებს ფაკულტეტის საბჭო შესაბამისი ვაკანსიის წარმოქმნიდან არა უგვიანეს 10 დღის ვადაში. აღნიშნული ვადის 3 თვემდე გაგრძელების შესახებ გადაწყვეტილებას იღებს შესაბამისი ფაკულტეტის საბჭო.
2. განცხადებაში აღინიშნება, თუ რა მოთხოვნებს უნდა აკმაყოფილებდეს კანდიდატი და წარსადგენი დოკუმენტების ნუსხა. მოთხოვნები და წარსადგენი დოკუმენტების ნუსხა განისაზღვრება აკადემიური საბჭოს აქტით.
3. ამ მუხლის პირველ პუნქტში აღნიშნული განცხადება ქვეყნდება კანდიდატების რეგისტრაციამდე არა უგვიანეს 1 და არჩევნების ჩატარებამდე არა უგვიანეს 2 თვით ადრე.

მუხლი 29. დეკანობის კანდიდატის რეგისტრაციაში გატარება

1. კანდიდატის რეგისტრაციაში გატარება იწყება შესაბამისი განცხადების გამოქვეყნებიდან 10 დღის შემდეგ.
2. დეკანად შეიძლება აირჩეს უნივერსიტეტის სრული ან ასოცირებული პროფესორი.
3. კანდიდატის რეგისტრაციაში გატარებისათვის, გარდა ამ მუხლის მე-2 პუნქტში აღნიშნული საბუთისა, სავალდებულოა მის მიერ პირადობის დამადასტურებელი მოწმობის ან პასპორტის და სამოქმედო გეგმის წარდგენა.
4. კანდიდატებს რეგისტრაციაში ატარებს შესაბამისი ფაკულტეტის საარჩევნო კომისია. რეგისტრაცია გრძელდება 20 დღის განმავლობაში.
5. კანდიდატის რეგისტრაციაზე უარი დასაბუთებული უნდა იყოს წერილობითი ფორმით.
6. რეგისტრაციაზე უარის შესახებ გადაწყვეტილებაში მიეთითება ხარვეზი კანდიდატის მიერ წარმოდგენილ დოკუმენტებში. ხარვეზის გასწორება შესაძლებელია 2 დღის ვადაში.

მუხლი 30. ფაკულტეტის დეკანის არჩევა

1. კანდიდატების რეგისტრაციის დასრულებიდან 10 დღის შემდეგ, მაგრამ არა უგვიანეს 15 დღისა, იმართება ფაკულტეტის დეკანის არჩევნები.
2. კანდიდატი ფაკულტეტის საბჭოს საჯაროდ წარუდგენს სამოქმედო გეგმას.
3. ფაკულტეტის დეკანი აირჩევა ფაკულტეტის საბჭოს მიერ ფარული კენჭისყრით, სიითი შემადგენლობის უმრავლესობით.
4. ფაკულტეტის დეკანი აირჩევა 4 წლის ვადით.

თავი XI. ფაკულტეტის ხარისხის უზრუნველყოფის სამსახურის უფროსის არჩევის წესი

მუხლი 31. ფაკულტეტის ხარისხის უზრუნველყოფის სამსახურის უფროსის არჩევა

1. უნივერსიტეტის ხარისხის უზრუნველყოფის სამსახურის უფროსი წარმომადგენლობითი საბჭოს მიერ დამტკიცებიდან 10 დღის ვადაში ფაკულტეტის საბჭოებს წარუდგენს ფაკულტეტის ხარისხის უზრუნველყოფის სამსახურის უფროსის კანდიდატურებს. ფაკულტეტის ხარისხის უზრუნველყოფის სამსახურის უფროსი შეიძლება იყოს ფაკულტეტის სრული ან ასოცირებული პროფესორი.
2. ფაკულტეტის შეიძლება წარედგინოს ერთი ან ერთზე მეტი კანდიდატურა.
3. ფაკულტეტის საბჭო კანდიდატის/კანდიდატების წარდგენიდან 5 დღის ვადაში სიითი შემადგენლობის უმრავლესობით ირჩევს ფაკულტეტის ხარისხის უზრუნველყოფის სამსახურის უფროსს, რაც ფორმდება ფაკულტეტის საბჭოს გადაწყვეტილებით.
4. ფაკულტეტის საბჭოს მიერ კანდიდატის აურჩევლობის შემთხვევაში, უნივერსიტეტის ხარისხის უზრუნველყოფის სამსახურის უფროსი ახალ კანდიდატს წარადგენს 3 დღის ვადაში.

5. ფაკულტეტის საბჭოს მიერ კანდიდატის შერჩევის ფარულობას უზრუნველყოფს ფაკულტეტის საარჩევნო კომისია.
6. უნივერსიტეტის ფაკულტეტის ხარისხის უზრუნველყოფის სამსახურის უფროსი არჩევიდან 20 დღის ვადაში უზრუნველყოფს სამსახურის დაკომპლექტებას.

თავი XII ფაკულტეტის საბჭოს არჩევის წესი

მუხლი 32. ფაკულტეტის საბჭოს არჩევა

1. ფაკულტეტის წარმომადგენლობითი ორგანოა ფაკულტეტის საბჭო, რომლის შემადგენლობაში შედიან ფაკულტეტის აკადემიური პერსონალის ყველა წევრი და სტუდენტთა თვითმმართველობის წარმომადგენლები, ან (თუ ამას ითვალისწინებს ფაკულტეტის დებულება) აკადემიური პერსონალისა და სტუდენტთა თვითმმართველობის არჩეული წარმომადგენლები. ამ შემთხვევაში ფაკულტეტის საბჭოს წევრთა რაოდენობა და არჩევის წესი განისაზღვრება ფაკულტეტის საბჭოს მიერ.
2. ფაკულტეტის საბჭო პირველი შეკრებისთანავე ცნობს თავის უფლებამოსილებას.

თავი XIII. არჩევნების ორგანიზების და ჩატარების წესი

მუხლი 33. წინასაარჩევნო აგიტაცია და კამპანია

1. მართვის ორგანოებში (მმართველ სუბიექტად) ასარჩევ კანდიდატს უფლება აქვს ჩაატაროს წინასაარჩევნო კამპანია. წინასაარჩევნო კამპანიის წარმართვისას ყველა კანდიდატი სარგებლობს თანასწორი უფლებით.
2. ასარჩევ კანდიდატებს და ამომრჩევლებს უფლება აქვთ გასწიონ წინასაარჩევნო აგიტაცია კანდიდატის მხარდასაჭერად.
3. წინასაარჩევნო კამპანია და აგიტაცია არ ფინანსდება უნივერსიტეტის მიერ.
4. არჩევნების დღეს კამპანიისა და აგიტაციის წარმოება იკრძალება.
5. წინასაარჩევნო კამპანიისა და აგიტაციაში მონაწილეობის უფლება არ აქვთ:
 - ა) საარჩევნო კომისიის წევრებს;
 - ბ) ადმინისტრაციულ პერსონალს.
6. წინასაარჩევნო კამპანია და აგიტაცია შესაძლებელია განხორციელდეს სხვადასხვა ღონისძიებების ჩატარებით (კრებები და შეხვედრები ამომრჩევლებთან, საჯარო დებატები და დისკუსიები), ბეჭდური სააგიტაციო მასალების გამოცემა-გავრცელებით, წინასაარჩევნო მოწოდებების, განცხადებების, ფურცლებისა და ფოტომოსალის დამზადებისა და გავრცელების გზით, აგრეთვე კანონმდებლობით ნებადართული ნებისმიერი საშუალებით. აკრძალულია მათი გავრცელებისათვის ხელის შეშლა.
7. წინასაარჩევნო კამპანიამ და აგიტაციამ არ უნდა შეუშალოს ხელი უნივერსიტეტში სასწავლო პროცესს. იკრძალება მეცადინეობებზე სტუდენტებთან საარჩევნო კამპანიისა და აგიტაციის ჩატარება, აგრეთვე ნებისმიერი ისეთი ქმედება, რაც შეუფერებელია ასარჩევი კანდიდატის სტატუსთან (პირდაპირი ან არაპირდაპირი გზით მოსყიდვა, ან რაიმე სიკეთის ან პრივილეგიის მინიჭება, ან ასეთის დაპირება და სხვა), ხელყოფს წესრიგს უნივერსიტეტში და აზიანებს უნივერსიტეტის ქონებას.
8. უნივერსიტეტის ადმინისტრაციულ პერსონალს უფლება არ აქვს დაუსაბუთებელი უარი უთხრას წინასაარჩევნო კამპანიისა და აგიტაციისათვის აუდიტორიებით, დარბაზებითა და დაწესებულების სხვა ქონებით უსასყიდლოდ სარგებლობაზე. დაწესებულების ფართით სარგებლობა ყველა კანდიდატისათვის თანაბრად მისაწვდომი უნდა იყოს.
9. ამ მუხლის მე-8 პუნქტით გათვალისწინებული უარი არის წერილობითი ფორმისა და მისი მიღებიდან 2 დღის ვადაში საჩივრდება შესაბამის საარჩევნო კომისიაში, რომელიც გადაწყვეტილებას იღებს 1 დღის ვადაში.

მუხლი 34. საარჩევნო სიები

1. საარჩევნო სიები დგება უნივერსიტეტის ადმინისტრაციის მიერ და გადაეცემა შესაბამის საარჩევნო კომისიას.
2. აკადემიური პერსონალისა და სტუდენტთა სიები დგება ცალ-ცალკე.
3. სტუდენტთა ამომრჩევლების სიებში შეიტანება მოცემული ფაკულტეტის ყველა სტუდენტი, რომელიც ირიცხება უნივერსიტეტში.
4. უნივერსიტეტის აკადემიური პერსონალის ამომრჩეველთა სიებში შეიტანება მოცემული ფაკულტეტის ყველა სრული პროფესორი, ასოცირებული პროფესორი და ასისტენტ-პროფესორი, გარდა დოქტორანტისა.
5. იმ შემთხვევაში, თუ აკადემიური პერსონალის წევრი დასაქმებულია ერთზე მეტ ფაკულტეტზე, იგი შეიტანება იმ ფაკულტეტის საარჩევნო სიაში, რომელზეც მას მეტი საათობრივი დატვირთვა აქვს. თუ აკადემიური პერსონალის წევრის საათობრივი დატვირთვა რამდენიმე ფაკულტეტზე თანაბარია, იგი თავად ირჩევს ფაკულტეტზე რეგისტრირებას.
6. ფაკულტეტის საარჩევნო სიაში შეიტანება შემდეგი მონაცემები:
 - ა) ამომრჩევლის სახელი და გვარი;
 - ბ) ამომრჩევლის პირადი ნომერი, საქართველოს მოქალაქის პირადობის მოწმობის მიხედვით.
7. ერთი და იმავე პირის მონაცემების რამდენიმე ფაკულტეტის საარჩევნო სიაში, ან ერთი ფაკულტეტის საარჩევნო სიაში ორჯერ შეტანა დაუშვებელია.

მუხლი 35. საარჩევნო ბიულეტენი

1. ამომრჩევლის მიერ ხმისმიცემა ხორციელდება საარჩევნო ბიულეტენზე სათანადო აღნიშვნით და საარჩევნო ბიულეტენის საარჩევნო ყუთში მოთავსებით.
2. საარჩევნო ბიულეტენი იბეჭდება უნივერსიტეტის მიერ, რაზეც პასუხისმგებელია რექტორი.
3. აკადემიური პერსონალისა და სტუდენტთათვის საარჩევნო ბიულეტენები იბეჭდება ცალ-ცალკე.
4. საარჩევნო ბიულეტენზე აღინიშნება:
 - ა) უნივერსიტეტისა და შესაბამისი ფაკულტეტის (თუ არჩევნებს ატარებს ფაკულტეტის საარჩევნო კომისია) სახელწოდება;
 - ბ) მართვის ორგანოს (მმართველი სუბიექტის) არჩევნებისთვის კუთვნილება;
 - გ) საარჩევნო ბიულეტენის კუთვნილება აკადემიური პერსონალისა სტუდენტებისათვის;
 - დ) ასარჩევი კანდიდატების ჩამონათვალი;
 - ე) არჩევნების ჩატარების თარიღი.
5. პირზე ერთზე მეტი საარჩევნო ბიულეტენის გაცემა, ასევე აკადემიურ პერსონალზე სტუდენტის საარჩევნო ბიულეტენის ან პირიქით გაცემა დაუშვებელია.
6. საარჩევნო ბიულეტენი გაიცემა პირადობის მოწმობის/პასპორტის წარდგენის საფუძველზე.

მუხლი 36. საარჩევნო ყუთი

1. უნივერსიტეტი არჩევნების ჩასატარებლად საარჩევნო კომისიებს უზრუნველყოფს გამჭვირვალე საარჩევნო ყუთებით. თითოეულ საარჩევნო კომისიას გადაეცემა 2 საარჩევნო ყუთი, აკადემიური პერსონალისა და სტუდენტებისათვის.
2. საარჩევნო ყუთზე თვალსაჩინო ფორმით აღინიშნება, თუ რომელი მართვის ორგანოს (მმართველი სუბიექტის) არჩევნებისთვისაა იგი განკუთვნილი, აგრეთვე მინიშნება (წარწერა) იმაზე, აკადემიური პერსონალისთვისაა განკუთვნილი თუ სტუდენტებისათვის.
3. საარჩევნო ყუთი კენჭისყრამდე მოწმდება, რათა საარჩევნო კომისიის წევრები და დამკვირვებლები დარწმუნდნენ, რომ იგი ცარიელია. კენჭისყრის დაწყებამდე საარჩევნო ყუთი ილუქება კომისიის წევრებისა და დამკვირვებლების თანდასწრებით და პირველი ამომრჩევლის საარჩევნო ბიულეტენტან ერთად

მასში მოთავსდება საკონტროლო ფურცელი, რაც არჩევნების შედეგების ნამდვილობის შემოწმების ერთ-ერთი საშუალებაა.

4. საკონტროლო ფურცელი დგება 2 ეგზემპლარად და მათზე აღინიშნება შესაბამისი მართვის ორგანოს (მმართველი სუბიექტის) დასახელება და პირველი ამომრჩევლის რეკვიზიტები (სახელი, გვარი, მისამართი), კომისიის ყველა წევრის ხელმოწერა. საკონტროლო ფურცლის 1 ეგზემპლარი რჩება საარჩევნო კომისიაში.

5. თუ საარჩევნო ყუთი არჩევნების პროცესში დაზიანდა, საარჩევნო კომისია უფლებამოსილია იმსჯელოს არჩევნების შედეგების ბათილად ცნობის შესახებ, თუ მიიჩნევს, რომ ამან შეიძლება გავლენა იქონიოს არჩევნების შედეგებზე.

6. თუ საარჩევნო ყუთში მისი გახსნის შემდეგ არ აღმოჩნდა საკონტროლო ფურცელი, ან მასში მოთავსებული საკონტროლო ფურცლის მონაცემები არ დაემთხვა საარჩევნო კომისიაში არსებულ საკონტროლო ფურცლის მონაცემებს, არჩევნების შედეგები ცხადდება ბათილად.

მუხლი 37. არჩევნების ორგანიზება

1. არჩევნები ტარდება უნივერსიტეტის აკადემიური საბჭოს მიერ დანიშნულ დღეს.

2. არჩევნების ორგანიზებასა და ჩატარებასთან დაკავშირებულ ხარჯებს ფარავს უნივერსიტეტი.

3. უნივერსიტეტის ადმინისტრაცია და ფაკულტეტი უზრუნველყოფს საარჩევნო კომისიისათვის შესაბამისი ოთახის გამოყოფას.

4. საარჩევნო კომისიები მუშაობას იწყებენ არჩევნების დღეს 9 საათზე. კენჭისყრა იწყება არჩევნების დღეს დილის 11 საათზე. მმართველი სუბიექტების არჩევნების შემთხვევაში კი - არჩევნებში მონაწილე კანდიდატურების სამოქმედო გეგმების განხილვის შემდეგ, არა უგვიანეს იმავე დღის 14 საათისა.

5. საარჩევნო კომისიების წევრები არჩევნების დღეს დილის 10 საათამდე წილისყრით ინაწილებენ ფუნქციებს. წილისყრის შედეგად გამოვლენილ უნდა იქნეს:

ა) რეგისტრატორი;

ბ) საარჩევნო ბიულეტენზე ხელმომწერი;

დ) ამომრჩეველთა ნაკადის მარეგულირებელი.

6. საარჩევნო კომისიის თავმჯდომარე და მდივანი წილისყრაში არ მონაწილეობენ.

მუხლი 38. არჩევნების პროცედურა

1. კენჭისყრის დღეს ამომრჩეველი საარჩევნო კომისიის რეგისტრატორისაგან იღებს შესაბამის საარჩევნო ბიულეტენს, რასაც ადასტურებს ამომრჩეველთა სიაში საკუთარი გვარის გასწვრივ ხელმოწერით. ამის შემდეგ, ამომრჩეველი მიდის კომისიის ხელმომწერ წევრთან, რომელიც საარჩევნო ბიულეტენის შესაბამის გრაფაში აწერს ხელს. შემდეგ ამომრჩეველი შედის სპეციალურად მოწყობილ საარჩევნო კაბინაში. მას შემდეგ, რაც ამომრჩეველი წრიულად შემოხაზავს მისთვის სასურველ 1 კანდიდატურას, იგი საარჩევნო ბიულეტენს აგდებს საარჩევნო ყუთში და გადის საარჩევნო კომისიის ოთახიდან. ოთახში სამზე მეტი ამომრჩევლის ერთდროულად ყოფნა დაუშვებელია.

2. კაბინად შეიძლება ჩაითვალოს აგრეთვე ნებისმიერი განცალკევებული ადგილი, სადაც ხმის მიცემის ფარულობა იქნება დაცული.

3. ხმის მიცემისას საარჩევნო ბიულეტენში შემოხაზვა უნდა მოხდეს ერთი და იმავე კალმით, ან ტექნიკური საშუალებით (სპეციალური შტამპით), რის შესახებაც გადაწყვეტილებას წინასწარ იღებს საარჩევნო კომისია, სითით შემადგენლობის უმრავლესობით, ღია კენჭისყრით, რაც ფიქსირდება შესაბამის ოქმში.

მუხლი 39. არჩევნების შედეგების შეჯამება

1. კენჭისყრა დასრულდება არჩევნების დღეს, 17 საათზე.

2. კენჭისყრის დასრულების შემდეგ საარჩევნო კომისიის წევრები ითვლიან საარჩევნო სიებში ხელმოწერების მიხედვით არჩევნებზე გამოცხადებულ ამომრჩეველთა რაოდენობას ცალ-ცალკე, აკადემიური პერსონალისა და სტუდენტებისათვის, რაც ფიქსირდება შესაბამის შემაჯამებელ ოქმში, რომელშიც აისახება არჩევნებში მონაწილე ყველა კანდიდატის მიერ მიღებული ხმების რაოდენობა.

3. არჩევნები ჩატარებულად ითვლება, თუ გამოცხადდა ამომრჩეველთა სიებში შეტანილ ამომრჩეველთა 2/3 მაინც, აკადემიური პერსონალისა და სტუდენტებისათვის ცალ-ცალკე, თუ ამ დებულებით სხვა რამ არ არის დადგენილი.

4. არჩევნებზე გამოცხადებულ ამომრჩეველთა რაოდენობის დათვლის შემდეგ იხსნება საარჩევნო ყუთი და კომისიის წევრები ითვლიან საარჩევნო ბიულეტენებს. პირველად იხსნება და ითვლება აკადემიური პერსონალისათვის განკუთვნილი საარჩევნო ყუთი, ხოლო შემდეგ – სტუდენტებისათვის.

5. საარჩევნო ყუთიდან ამოღებული და შემოხაზული საარჩევნო ბიულეტენები ლაგდება ცალ-ცალკე, არჩევნებში მონაწილე კანდიდატურების მიხედვით.

6. საარჩევნო ბიულეტენი ბათილია, თუ:

ა) არ აღმოჩნდა საარჩევნო ბიულეტენზე ხელმომწერი კომისიის წევრის ხელმოწერა;

ბ) თუ არ არის შემოხაზული არც ერთი კანდიდატურა;

გ) თუ შემოხაზულია ერთზე მეტი კანდიდატურა;

დ) თუ შეუძლებელია გაირკვეს, რომელ კანდიდატს მისცა ხმა ამომრჩეველმა;

ე) სრულყოფილად არ არის მითითებული ამ დებულების 35-ე მუხლის მე-4 პუნქტით განსაზღვრული საარჩევნო ბიულეტენის რეკვიზიტები;

ვ) თუ მასზე აღმოჩნდა რაიმე სახის მონიშვნა.

7. ხმების დათვლისთანავე ივსება შემაჯამებელი ოქმები, ცალ-ცალკე, აკადემიური პერსონალისა და სტუდენტებისათვის, რომლებშიც შეიტანება შემდეგი მონაცემები:

ა) ამომრჩეველთა რაოდენობა სიების მიხედვით;

ბ) არჩევნებზე გამოცხადებულ ამომრჩეველთა რაოდენობა საარჩევნო სიებში ამომრჩეველთა ხელმოწერების მოხედვით;

გ) საარჩევნო ყუთში აღმოჩენილი საარჩევნო ბიულეტენების საერთო რაოდენობა;

დ) ბათილი საარჩევნო ბიულეტენების რაოდენობა;

ე) თითოეული კანდიდატის მიერ მოპოვებული ხმების რაოდენობა;

ვ) ინფორმაცია საკონტროლო ფურცლის შესახებ;

ზ) კომისიის ყველა წევრის ხელმოწერა.

8. ფაკულტეტიდან აკადემიურ და წარმომადგენლობით საბჭოებში არჩეულად ითვლება საუკეთესო შედეგების მქონე იმდენი კანდიდატი, რამდენიც დადგენილია უნივერსიტეტის წესდებით ამ ფაკულტეტის აკადემიური პერსონალისა და სტუდენტებისათვის.

9. ფაკულტეტის საბჭოში არჩეულად ითვლება საუკეთესო შედეგების მქონე იმდენი კანდიდატი, რამდენიც დადგენილია ფაკულტეტის დებულებით.

თავი XIV. არჩევნების მეორე ტურისა და განმეორებითი არჩევნების ჩატარების წესი

მუხლი 40. არჩევნების მეორე ტურისა და განმეორებითი არჩევნების ჩატარების პირობები

1. თუ არჩევნებში მონაწილეთაგან ვერც ერთმა ვერ მიიღო საჭირო ხმების რაოდენობა, არჩევნების ჩატარებიდან 10 დღის ვადაში ინიშნება არჩევნების მეორე ტური მხოლოდ იმ ორი პირის მონაწილეობით, ვინც მოაგროვა ხმების მაქსიმალური (მეტი) რაოდენობა.

2. თუ არჩევნების პირველ ტურში საკონკურსო თანამდებობაზე მონაწილეობდა მხოლოდ 1 კანდიდატი და მან ვერ მიიღო საჭირო ხმების რაოდენობა, ან არჩევნების მეორე ტურში ვერ გამოვლინდა გამარჯვებული, ინიშნება განმეორებითი (ხელახალი) არჩევნები შესაბამისი პროცედურების სრული დაცვით.

თავი XVIII. არჩევნების პროცედურისა და შედეგების გასაჩივრების წესი

მუხლი 41. არჩევნების შედეგების გასაჩივრება

1. თუ ამ დებულებით სხვა რამ არ არის დადგენილი, არჩევნების შედეგების გამოცხადებიდან 24 საათის განმავლობაში არჩევნებში მონაწილე კანდიდატს, დამკვირვებელს, საარჩევნო კომისიის წევრს ან შესაბამის ამომრჩეველს უფლება აქვს შეიტანოს საჩივარი ამ დებულებით დადგენილი წესის დარღვევასთან დაკავშირებით შესაბამის საარჩევნო კომისიაში. ამ ვადის გასვლის შემდეგ საჩივრები არ მიიღება.
2. საჩივარი უნდა შეიცავდეს შემდეგ რეკვიზიტებს:
 - ა) საჩივრის შემომტანი პირის სახელი, გვარი, მისამართი;
 - ბ) საჩივრის შემომტანი პირის სტატუსი (არჩევნებში მონაწილე კანდიდატი, დამკვირვებელი, საარჩევნო კომისიის წევრი, ამომრჩეველი);
 - გ) დარღვევის შინაარსი;
 - დ) მოწმეების ვინაობა (იმ შემთხვევაში, თუ არსებობენ მოწმეები, რომლებიც დაადასტურებენ ამ ფაქტობრივ გარემოებას);
 - ე) საჩივრის შემომტანი პირის მოთხოვნა;
 - თ) საჩივრის შემომტანი პირის ხელმოწერა.
3. საჩივარს თან ერთვის დარღვევის ოქმის ასლი, ასეთის არსებობის შემთხვევაში.
4. საარჩევნო კომისია ვალდებულია საჩივრის შეტანიდან 3 დღის განმავლობაში განიხილოს საჩივრები და მიიღოს სათანადო გადაწყვეტილება.
5. არჩევნების ბათილად ცნობის შესახებ გადაწყვეტილებას საარჩევნო კომისია იღებს იმ შემთხვევაში, თუ მიიჩნევს, რომ ამ დებულებით დადგენილი წესის ან/და საარჩევნო კომისიის მიერ საარჩევნო ბიულეტენების დათვლის პროცესში გამოვლენილმა დარღვევამ არსებითი გავლენა იქონია არჩევნების შედეგზე.
6. საარჩევნო კომისიის გადაწყვეტილება შეიძლება გასაჩივრდეს სასამართლოში თანახმად მოქმედი კანონმდებლობისა.

თავი XIX. არჩევნების საბოლოო შედეგების გამოქვეყნება

მუხლი 42. საბოლოო შედეგების გამოქვეყნება

1. საარჩევნო კომისია არჩევნების საბოლოო შედეგებს აქვეყნებს არჩევნების დასრულების დღეს, მისი ჩატარების ან/და ყველასათვის ხელმისაწვდომ ადგილზე.
2. არჩევნების საბოლოო შედეგები ძალაში შედის გამოქვეყნებისთანავე.